

四庫全書

經部

欽定四庫全書

經部
春秋億卷二

詳校官監察御史_臣孫家賢

給事中_臣溫常綬覆勘

總校官原任中允_臣王燕緒

校對官中書_臣牛稔文

謄錄監生_臣任應銑

欽定四庫全書

經部五

春秋億

春秋類

提要

臣等謹案春秋億六卷明徐學謨撰學謨字叔明嘉定人嘉靖庚戌進士官至禮部尚書是編序題春秋億而卷首題曰徐氏海隅集目錄又題曰外編蓋其全集之一種十二公各為一篇不載經文而一一排比年月隨經

詮義蓋漢代經傳別行原不相屬似乎創例
實古法也大旨以春秋所書皆據舊史舊史
所闕聖人不能增益如隱莊閔僖之不書即
位桓三年以後不書王衛人鄭人從王伐鄭
不稱天以及月日之或有或無皆非聖人所
筆削一掃公羊穀梁無字非例之說與孫復
胡安國無事非譏之論夫春秋之作既稱筆
削則必非全錄舊文漫無褒貶學謨持論雖

未免矯枉過正然平心靜氣不事齟齬爭言簡
理明多得經意足以破諸家穿鑿附會之陋
其駁夏時周月之說曰為下而先倍烏在其
為春秋也可謂要言不煩者矣乾隆四十二
年十一月恭校上

總纂官

臣紀昀

臣陸錫熊

臣孫士毅

總校官

臣

陸

費

墀

春秋億序

說經者宜莫難於春秋匪說之難能明聖人之意之難也蓋自秦人滅學之後六經之闕佚者十六七矣獨春秋哉而春秋為甚漢儒喜以其意補經即於他經悖理亂真者不少苟以理絀之其誣可立辨也春秋事詞也事詞在千載之前有無疑似即有增損無從質之矣故曰說經者宜莫難於春秋也今之說春秋者類以左氏為之證而叅以公穀二家彼其因事以屬詞緣詞以命

例事同則詞同詞同則命例宜無不同然而正變相錯
權衡互異若繼弒一也或書即位或不書即位紀元一
也或書王正月或不書王正月或單書春王而不書正
月伐國一也或名或不名或爵或不爵專將帥師一也
或去其公子或不去其公子弒君一也或明其為弒或
不明其為弒乃三家各就其詞而為之說求之春秋之
本文其說皆無有也即以春秋之本文獨行於世千載
之下雖聖人復起不能指其詞之所之也故學者不得

不據傳以求經夫經之為言常也簡易明達之謂也聖
人作之將以垂憲于無窮而乃故為微曖難明之詞若
置覆焉而須傳以為之射則何異于日月之借光於燭
火乎必不然矣按班固藝文志云仲尼傷杞宋之亡徵
以魯周公之國禮文備物與左丘明共觀史記而脩春
秋當其時祇以口授弟子左氏懼其異言失真乃因本
事以作傳信斯言也則經與傳有輔車之倚焉不當獨
推尊孔氏矣即令附春秋而作其事詞已無不可信而

又何有于公穀二家乃漢初鼎列於學官而尹氏君氏
盟蔑盟與纂郛纂微厥慙屈銀之文又輒與左氏相齟
齬者不可勝紀夫經文一也然且彼亦一是非此亦一
是非況其有無疑似微曖難明者乎故知三家各受師
承以口說流行即左氏亦孔子以後之書自漢以來經
從傳出馬端臨以意增損之疑不為無謂而南宋大儒
顧復取其以意增損之詞為之懸想臆度斷以聖人之
特筆在是以其可解者謂之正例而以其不可解者強

名之曰變例至謂仲尼見諸行事之實以天自處削天子王奪位于國去氏族于卿大夫略無顧忌雖一時進御之言意在納約然謂之說傳則可謂之說經則不可亦何怪乎求之愈深而失之愈遠也聖人之意其尚可得而見耶聖人之意簡易明達要以仍人道正王法善善惡惡是是非非刪繁舉要據事直書如斯而已者也故繫王于天則文武之威靈猶在托筆於史則周公之袞鉞具存即有所褒諱貶損皆天子之事史官之職也

而舉不以己與焉夫是以二百四十二年諸侯卿大夫之功罪不必屑屑焉衡較于爵氏名族之予奪而其情固莫之能適矣故曰其事則齊桓晉文其文則史其義則丘竊取之於乎盡之矣說春秋者孰有深切著明於孟氏者哉愚故以易起家少不自揆間嘗旁窺是經輒苦其難通迄今三十餘年髮鬢短矣茲以填郕之隙因感杜征南在襄陽時箋釋左氏乃重掇三氏併范楊何孔諸家疏解與胡氏之傳猥加哀輯稍畧其正變之

例缺其有無疑似之文祇采其說之不詭于理者以符
會孔氏竊取之義而彙為一書名之曰春秋億凡如干
卷亦知其不可以幸中第無敢拘傳蔑經隨人射覆以
坐失聖人之意云爾

欽定四庫全書

原序

欽定四庫全書

春秋億卷一

隱公

明 徐學謨 撰

元年春王正月元年者紀魯之元也何以紀魯之元也
春秋魯史也紀元當先魯焉書春王正月王謂周之共
主也而穀梁以為始受命之文王非也魯史而冠以春
王正月公羊之所謂大一統也正月者周以建子之月

為春也胡氏曰以夏時冠周月其說不可解也如以建
子之月非春則後書大無麥禾書大雨震電之類何以
皆周之時周之月也又曰行夏之時孔子見諸行事之
實益不可解也為下而先倍焉在其為春秋也不書隱
公即位者何也左氏以為攝也曰桓貴而隱卑也桓幼
隱立而奉之故曰攝也隱固卑也而桓亦非貴也夫人
仲子之子也諸侯不再娶惠公之元妃孟子也娶仲子
以為夫人也仲子不竝妃桓何以稱貴也公羊穀梁曰

成公志也以惠公志欲立桓而成之也隱將反國於桓也此皆意之也隱長而賢其立宜也隱立而改元矣稱公矣天子之使臨之矣與諸侯會盟戰伐矣何諱其即位也不書即位非直隱也而莊而閔而僖也而桓之弑隱而立賊也何以不諱即位也而隱莊閔僖之不書即位也疑皆史之闕也非孔子削之也三月公及邾儀父盟於蔑此書盟之始也儀父邾子字也三傳曰書字褒之也何以褒之也謂其與公盟也名與字皆史之文也

非孔子別之也盟誓非古也狙詐之漸也義係於盟何以褒也夏五月鄭伯克段於鄆公羊曰克之何殺之也殺之則曷為謂之克大鄭伯之惡也曷為大鄭伯之惡母立之而已殺之也段以弟而畔兄將不利於其國鄭伯所宜討也何以大鄭伯之惡也討不告于王是鄭伯之罪也故書克若以力勝之不以義勝之也不書公弟不弟之也秋七月天王使宰咺來歸惠公仲子之賵左氏公羊曰仲子桓公之母也穀梁曰惠公之母而孝公

之妾也其說何以互異也三傳皆意之也仲子不稱妃
不稱夫人諸侯之妾也毋論惠公桓公之母皆非天子
之所宜賁也而以為不及事譏之譏其已葬而賁無所
施于春秋之義何當也九月及宋人盟於宿春秋書人
義二一衆詞也一略詞也此略詞也穀梁曰及者何內
卑者也宋人外卑者也卑者之盟不日不日者史闕之
也疑非以卑者之盟也胡氏曰凡言盟者惡之是也而
不係於日不日也冬十有二月祭伯來不言天王使祭

伯自來也穀梁曰不正其外交也春秋王國之使多不
書使或史略之也而以為不正其外交疑意之也公子
益師卒穀梁曰大夫日卒正也不日卒惡也益師事無
可據何以知惡也公子軀卒書日公子季友卒書日以
為善之也而公子牙季孫意如宜惡之矣而又何以日
書乎益師不書日史略之也而孔子不以日不日為褒
貶也 二年春公會戎于潛左氏曰脩惠公之好也書
會不當會也戎不可長也書之以著魯之輕會也夏五

月莒人入向穀梁曰入者內弗受也我無罪而入之也
春秋凡書入國無王也無駭帥師入極無駭與極同姓
也書入貶也秋八月庚辰公及戎盟于唐與戎盟貶也
九月紀履緌來迎女冬十月伯姬歸於紀公羊曰譏不
親迎也諸侯越國而親迎禮也而大夫代之逆非禮也
紀子伯莒子盟于密左氏曰紀子帛也而杜氏曰莒魯
有怨而紀侯以昏故解之也十有二月乙卯夫人子氏
薨杜氏曰子氏仲子也桓之母也以左氏豫凶事之語

疑之也穀梁曰隱之妻也卒不書葬夫人之義從君者也疑是也鄭人伐衛鄭共叔之亂也公孫滑出奔衛衛人為之伐鄭取廩延至是鄭人伐衛討滑之亂也無王命而伐之而又以脩怨焉悖也凡書伐貶也所謂春秋無義戰也三年春王二月己巳日有食之公羊曰紀異是也不言日史闕之也而公羊曰或日或不日不日非食正朔也或失之前或失之後也穀梁曰言日不言朔食晦日也疑皆鑿也即晦而日食之尤異也孔子何

以不書晦也三月庚戌天王崩凡天王盟葬皆書大一
統也夏四月辛卯尹氏卒公羊曰貶也譏世卿也何以
知其譏世卿而胡氏從而為之詞也左氏以為君氏也
隱公之母也或婦人或男子傳疑也凡此類者無係于
褒貶也秋武氏子來求賻公羊曰喪事無求求賻非禮也
天王崩而魯不歸賻故書求也君弱臣強示交貶也八
月庚辰宋公和卒以訃書也日不日名不名無係於春
秋之義也冬十有二月齊侯鄭伯盟于石門外盟書以

來告也癸未葬宋穆公內會書也凡葬以會則書不會則不書也而胡氏求書不葬之說謂有急于禮而不葬者有弱其君而不葬者有討其賊而不葬者有諱其辱而不葬者有治其罪而不葬者有避其號而不葬者疑皆意之鑿也非春秋指也 四年春王二月莒人伐杞取牟婁穀梁曰言伐言取所惡也諸侯相伐取地於是始故謹而志之也外取邑不書有告則書也戊申衛州吁弑其君完書弑君之始也其不書公子者州吁弑君

之賊衛不以公子告也義係弑君也胡氏以莊公不待以公子之道故不稱公子而以國氏著後世為人君父者之戒也州吁有寵而好兵而公弗禁石碏諫而公弗從此左氏之傳也孔子烏知後有傳之者豫置覆而使入射之也此儒者信傳之過也夏公及宋公過于清春秋書遇之始也公羊曰遇者何不期也穀梁曰內為志焉耳元年宿之盟而今復尋之也謂私相遇可也而胡氏以為惡其無人君相見之禮曷徵之也宋公陳侯蔡

人衛人伐鄭書諸侯會伐之始也書公書侯其君自往也書人衆詞也或非其君自往也左傳曰衛州吁脩納公子之怨于鄭也諸侯不當私相會伐也而州吁弑君之賊不能討而佐以伐國尤非也秋翬帥師會宋公陳侯蔡人衛人伐鄭公羊曰翬者何公子翬也何以不稱公子貶曷為貶與弑公也夫弑公事在鍾巫之祭謂以與弑公而豫貶之非也伐鄭之役宋人來乞師公弗許之矣翬強之而行黨州吁以脩怨是無君也書翬帥師

著非君命也貶不係于不書公子也亦有書公子帥師而貶者慶父於餘丘之役是也九月衛人殺州吁于濮穀梁曰稱人以殺殺有罪也公羊曰討賊之辭也均善之也衛之賊衛人既殺之矣而胡氏又以為罪四國諸侯之不討賊苛詞也冬十有二月衛人立晉公羊曰晉者何公子晉也立者不宜立也其稱人何衆立之之辭也夫晉得衆矣得衆宜立矣而乃責其不宜立何也衆人立之而不請於王也此春秋之指也 五年春公觀魚

于棠觀魚而略地於棠弗僖伯之諫焉書之謹逸遊也
夏四月葬衛桓公以會書也公被弑也而謚桓焉胡氏
何以知其為臣子之私謚之也曰衛本侯爵而稱公也
夫稱公者國人來告之詞也疑無所嫌也秋衛師入郕
衛亂初定而以師入人之國不貶而自貶也九月考仲
子之宮初獻六羽禮諸侯不再娶惠公之元妃孟子也
而仲子夫人也夫人不得祔于廟而隱別宮以享之啟
亂也又初獻六羽焉耦于妃矣尤非禮也邾人鄭人伐

宋宋人取邾田而邾人告于鄭以伐之也邾小而序于鄭之上伐謀也不貶而自貶也螟穀梁曰蟲災也甚則月不甚則時公羊曰紀災也冬十有二月辛巳公子彊卒彊臧僖伯也稱公子以同姓之大夫也其不稱大夫者穀梁曰先君之大夫也隱不成為君故不爵命大夫也此附會詞也宋人伐鄭圍長葛左氏曰報入邾之役也夫伐國而凡言圍者甚宋也六年春鄭人來輸平穀梁曰輸者墮也平之為言以道成也來輸平者不果

成也非也胡氏曰輸者納也納成于魯也公之未立與鄭人戰於狐壤止焉元年及宋盟于宿四年遇于清其秋會師伐鄭脩舊怨也五年而鄭人伐宋入其郛宋來告命而使者失辭公怒而止至是鄭伯來納成焉善之也至曰以利相結而貶之于經義曷徵之也夏五月辛酉公會齊侯盟於艾此齊魯交好之始故書之也秋七月公羊曰此無事何以書春秋編年四時具然後為年也似也冬宋人取長葛先是圍長葛矣圍逾年而取之

書取不當取也土地受之天王非諸侯可得而私取之也宋瑒之罪益又甚矣七年春王三月叔姬歸于紀叔姬伯姬之媵也非夫人也則何以書以待年而遲歸婚于國為大事故書之也蘇氏曰以其賢而書之非經義也滕侯卒以赴書也而胡氏以滕訃雖及而魯不卹也於經義曷徵之也夏城中丘此書城之始也公羊曰中丘者何內之邑也城中丘何以書以重書是也凡書城之例也而左氏曰書不時也穀梁曰凡城之志皆譏

也二傳疑皆鑿也齊侯使其弟年來聘此齊聘之始也
禮小聘曰問使大夫大聘使卿年不稱卿稱大夫而稱
弟明不當使也齊僖公之嬖弟廢禮也秋公伐邾左氏
曰公伐邾為宋討也諸侯不得自相伐而隱為宋伐邾
尤非也昧之盟何在也冬天王使凡伯來聘此周聘之
始也戎伐凡伯于楚丘以歸楚丘衛地也天子之使經
之衛人不為之具徒詰奸而令戎得而伐之又執之以
歸而衛終弗救也無王矣書楚丘甚衛罪也 八年春

宋公衛侯遇于垂垂衛地他國相遇而書者以來告也
三月鄭伯使宛來歸祊庚寅我入祊鄭以祊易魯許田
也祊近魯宣王賜鄭湯沐地以助太山之祀也許近鄭
成王賜魯朝宿地以獎周公之勲也賜地而書歸書入
交示貶也夏六月己亥蔡侯考父卒考父蔡侯名也辛
亥宿男卒不名也名不名從其國之赴也胡氏曰諸侯
薨訃不以名而仲尼革之必以名書變周制也以爲作
春秋之驗也孔子而變周制則春秋可以無作也秋七

月庚午宋公齊侯衛侯盟于瓦屋齊尊而先宋宋主盟也以來告書也八月葬蔡宣公以會書也九月辛卯公及莒人盟于浮來胡氏曰莒人微也而魯與之盟譏謙而失禮也非也譏在盟而不在微也螟紀災也冬十有二月無駭卒不書氏不書爵者略之也九年春天王使南季來聘穀梁曰聘諸侯非正也周禮天子時聘以結諸侯之好曷謂非正也天子有聘而隱未嘗朝周書之微陵夷之漸也三月癸酉大雨震電庚辰大雨雪周

之三月今建寅之月也雨雪宜也而震電不宜也既震電而又雨雪徵舛也挾卒不書大夫者略之也夏城郎書重也非不時也秋七月無事而存時也冬公會齊侯于防胡氏以為非王事而私相會皆譏也 十年春王

二月公會齊侯鄭伯于中丘謀伐宋也夏輦帥師會齊人鄭人伐宋輦帥師者輦自帥師也不候公命而先期往也伐鄭伐宋兩書輦帥師徵無將也六月壬戌公敗宋師于菅辛未取郕辛巳取防書取不宜取也諸侯各

有分土也秋宋人衛人入鄭書入乘鄭之虛也宋人蔡人衛人伐戴鄭伯伐取之上書宋人衛人入鄭矣又書宋人蔡人衛人伐戴而鄭伯伐取之疑三國入鄭而又圍戴戴小國也鄭伯素強禦三國而兼取戴焉左傳所謂取三師是也交示貶也冬十月壬午齊人鄭人入郕左傳云鄭公以王命討宋而郕人不會故伐而入之也程氏曰討違王命不書入書入非王命可知也十有一年春滕侯薛侯來朝諸侯相朝正也滕薛小而魯大

書來朝滕薛自來朝而魯不報也貶自見也夏五月公會鄭伯于時來謀許也秋七月壬午公及齊侯鄭伯入許書入許許無刑而伐之侮弱也冬十有一月公薨不書地不正終也左氏云羽父譖于桓公而使賊弑之也何以不書弑也隱之也為宗國諱也非宗國不諱也以正亂賊也

桓公

元年春王正月公即位公羊曰繼弑君不言即位此其

言即位何如其意也言如其弑君欲即位意以著其惡也此以莊公繼弑不書即位而曲為之說也桓誠惡矣國人已奉之為君未有不書其即位者也其有不書即位者史之闕也非仲尼削之也三月公會鄭伯於垂鄭伯以璧假許田先是鄭歸枋矣至是加璧以易許田焉稱假遜辭也公羊曰有天子存則諸侯不得專地許田魯朝宿邑也胡可假也書之譏也夏四月丁未公及鄭伯盟于越書及者內為志也秋大水紀災也冬十月無

事闕也 二年春王正月戊申宋督弑其君與夷及其
大夫孔父宋來告也督先殺孔父而後弑殤公書及其
大夫孔父者與國之難不敢先君賢之也滕子來朝滕
故侯爵也今書子何也漢儒以為時王黜之也胡氏以
為桓弑君之惡也而滕先鄰國朝之仲尼斥而子之也
仲尼烏得而子之也曰春秋天子之事也仲尼假魯史
用五刑奉天討誅亂賊垂天子之法於後世也夫仲尼
雖聖臣也微也烏得僭天子之權以奪人之爵也隱公

被弑而書薨諱之也桓公弑君而書即位不敢斥君也
天子之事不用於魯而獨用於滕而奪之爵是以臆見
窺聖人也孟子所謂天子之事者何也如春秋紀年必
冠以春王正月係主於天以見天下之共主猶在也天
下之共主猶在而列國之功罪即事而自著也此竊取
之義也其不書滕侯而書滕子者焉知非時王斥之也
仍史之舊也終春秋之世而滕稱子豈皆以朝弑君而
斥之也三月公會齊侯陳侯鄭伯于稷以成宋亂漢儒

曰宣四年公及齊侯平莒及郟傳曰平者成也然則成亦平也春秋故為尊親諱也而胡氏以為桓受賂以主華氏桓之惡不能諱而直書成宋亂似解成之誤也仲尼書法疑不若是之淺也夏四月取郟大鼎于宋戊申納于太廟不書宋賂而書取之而納之廟桓之所以成宋亂者如此也不貶而貶自見也秋七月杞侯來朝杞與滕皆來朝桓而滕書子杞仍書侯何也胡氏以為齊欲伐杞杞求魯為之主非桓立而朝之也美惡不嫌同

辭也此以左氏為據也仲尼之經炳如日星何侯于左氏之翼而為曖昧不明之詞也亦曰桓弑而立書二國來朝明不當來朝也蔡侯鄭伯會于鄧左氏曰始懼楚也九月入杞左氏曰討不敬也杞來朝魯而魯入于杞不貶而自貶也公及戎盟于唐冬公至自唐桓與戎盟非也七月盟而冬始至自唐譏久也公穀皆言危之也似意之也凡君之出入必書春秋例也三年春正月不書王胡氏以為桓無王而不書王也不書王而桓益

無王矣非春秋指也非仲尼待宗國之禮也元年書王
矣二年書王矣何獨三年以後不書王乎十二公不書
王正月多矣疑皆史之闕也公會齊侯于贏夏齊侯衛
侯胥命于蒲公穀左皆以為胥之為言相也古者不盟
結言而退近正也春秋之義謹私會也即結言而退無
取之矣六月公會杞侯于盛左氏曰求成也倏而入之
倏而求成之皆非禮也秋七月壬辰朔日有食之既書災
也曰既書災甚也公子翬如齊逆女穀梁曰逆女親者

也使大夫非正也夫使非正而輦不去公子何也註曰桓公不以輦為罪人也桓公不以為罪人而書公子是春秋為遂過之書也非也書公子不書公子仍史之舊也非仲尼筆削之也九月齊侯送姜氏于謹公會齊侯于謹夫人姜氏至自齊穀梁曰送女適竟非禮也公會齊侯于謹胡氏以為譏不親迎也夫合二姓之好以繼萬世之後親迎禮也齊與魯近其禮可行也若其遠也可廢國事而行親迎乎逆諸境亦禮也似不必泥古之過

也冬齊侯使其弟年來聘左氏曰致夫人也詞無褒貶
也有年紀祥也胡氏曰桓不當有年而書有年為變異
也年之豐凶民命焉繫君雖無道民何罪焉而不當有
年乎傳之鑿也四年春正月公狩於郎公羊曰譏遠
也周之春夏之冬也冬曰狩禮也而狩于遠地遠也夏
天王使宰渠伯糾來聘書仍史之文也胡氏以為糾位
六卿之長而聘桓焉仲尼降從中士之例書名貶也糾
王使之也非自聘也即有貶焉糾無罪也仲尼亦何所

恃而能貶王之卿為中士也亦曰魯未朝周而天王使宰來聘焉不貶而自貶也 五年春正月甲戌己丑陳

侯鮑卒左氏曰陳亂兩赴之也故甲戌己丑兩存之也

夏齊侯鄭伯如紀左氏曰齊鄭將襲紀紀人知之以

來告書也書如伐謀也天王使仍叔之子來聘周遞年

來聘魯而魯未朝周故書之也胡氏曰仍叔之子云者

譏世官非公選也仲尼之意似未暇及仍叔之子也蔡

陳桓公以會書也城祝丘書大役也秋蔡人衛人陳人

從王伐鄭王奪鄭伯政鄭伯不朝王以諸侯伐鄭天子
討而不伐書伐弱王也鄭有罪不能命諸侯討罪而以
諸侯之師自伐之所以啟敗也書伐而譏自著也胡氏
以王不能討桓之罪而伐鄭仲尼何敢削天子王也不
書天者疑亦史之闕也大雩胡氏曰大雩者雩于上帝
諸侯不得祭天地也於三傳無所據也凡宗國之典皆
稱大臣子之詞也螽書災也冬州公如曹穀梁曰外相
如不書此其書何也過我也 六年春寔來寔州公名

也來非來朝也如曹而過我書來也詞無褒貶也夏四月公會紀侯于郕郕魯地紀侯來會也秋八月壬午大閱不書地者閱于國也書八月者非時而簡車馬也穀梁曰蓋以觀婦人不知何所據也蔡人殺陳佗佗陳君也不書陳君以其篡弑雖即位逾年不成之乎為君也書人衆詞也書殺幸之也穀梁曰陳侯與蔡人爭禽蔡人不知其是陳君也而殺之疑附會也九月丁卯子同生冢嫡始生書大事也後君舉子不書舉一以見例也

穀梁曰疑故志之鑿也冬紀侯來朝自曹來朝也齊謀之而求託國于魯也七年春二月己亥焚咸丘公穀皆云焚用火攻也咸丘邾婁之邑也胡氏以為焚林而田也于傳若無所據闕之可也夏穀伯綏來朝鄧侯吾離來朝公穀曰失國而朝故名之也名仍史之文也非仲尼名之也胡氏曰桓公弑君而穀鄧來朝見諸侯不脩其職而去秋冬二時尤鑿也即秋冬而有事可書仲尼亦將去二時乎不書史闕之也八年春正月己卯

烝烝祭名也穀梁曰烝冬事也春興之志不時也天王使家父來聘家采地父字也天子之大夫也家父來聘胡氏以為不加貶者前貶宰渠伯糾矣此大夫不必貶也見春秋任宰相之專鑿也桓公即位八年而周三聘焉桓未朝周示君弱臣強也夏五月丁丑烝半歲而兩烝焉著數也秋伐邾魯自伐之也冬十月雨雪書不時也冬而雨雪何以不時也周之十月夏之八月非雨雪時也胡氏以為周改年不改月此可證其非也祭公來

遂逆王后于紀王使魯主昏故祭公來受命而迎也天子無外故因稱王后卿不書舉重略輕也凡言遂因上事生下事之詞也而胡氏以祭公論道之官不宜使之輕而祭公緣此得專命不報遂行如紀而王以輕使為失祭公以遂行為罪是於無過中求有過也天子不親迎而使公逆何不可也祭公既來魯而遂逆王后于紀焉此非翬帥師之類也何專之有九年紀季姜歸于京師從其女歸之稱也夏四月秋七月事闕也冬曹伯

使其世子射姑來朝曹伯有疾不能朝而世子攝也

十年春王正月庚申曹伯終生卒以赴書也夏五月葬曹桓公以會書也秋公會衛侯于挑丘弗遇衛失信也郎之師所由啟也冬十有二月丙午齊侯衛侯鄭伯來戰於郎春秋以魯為內外伐而書來戰公穀以為諱其敗也十有一年春正月齊人衛人鄭人盟于惡曹書人衆辭也略之也以郎之戰而書也夏五月癸未鄭伯寤生卒以赴書秋七月葬鄭莊公以會書也九月宋人執鄭

祭仲以祭仲之立忽也忽長而立之是也宋人執祭仲
欲以立突也突歸于鄭祭仲之刳于宋而又立突也鄭
忽出奔衛突奪其國也書突而歸于鄭也見宋人強援
之也書忽而加鄭焉本鄭出奔于衛見其當立不當出
奔也柔會宋公陳侯蔡叔盟于折柔魯大夫也書大夫
會盟諸侯之始也公會宋公于夫鍾冬十有二月公會
宋公于闕屢會而屢書之志私也 十有二年春正月
事闕也夏六月壬寅公會杞侯莒子盟于曲池曲池魯

地杞莒來會也秋七月丁亥公會宋公燕人盟于穀丘
穀丘宋地會于宋也八月壬辰陳侯躍卒以赴書也公
會宋公于虛冬十有一月公會宋公于龜書屢會也丙
戌公會鄭伯于武父始公欲平宋鄭故屢會而宋辭平
焉乃與鄭會謀伐宋也十有二月及鄭師伐宋丁未戰
于宋先是屢會而宋無信焉故書伐以章宋罪也公穀
云言戰于宋諱敗也十有三年春二月公會紀侯鄭
伯己巳及齊侯宋公衛侯燕人戰齊師宋師衛師燕師

敗績此齊人合宋衛燕之師伐紀魯與鄭助紀而四國
之師敗也三月葬衛宣公魯方與衛戰而猶來告葬春
秋之國乍合乍離皆此類也夏大水志災也秋七月冬
十月事闕也十有四年春正月公會鄭伯于曹脩武
父之好也無冰志災也周之正月夏之十一月也而胡
氏亦曰仲冬之月何與春王正月之論自異也夏五無
月胡氏以為傳疑也史闕文之證也夏五之下必知脫
月字疑而不益聖人之慎也鄭伯使其弟語來盟左氏

曰來尋盟且修曹之會也秋八月壬申御廩災志災也
乙亥嘗胡氏曰志不時與不敬也冬十有二月丁巳齊
侯祿父卒以赴書也宋人以齊人蔡人衛人陳人伐
鄭左氏曰報宋之戰也胡氏曰以者能左右之以行
己意也十有五年春二月天王使冢父來求車公
羊曰王者無求求車非禮也故書以譏之也三月乙
未天王崩以赴書大一統也夏四月己巳葬齊僖公
以會書也不供天王之喪而會齊僖之葬悖之甚也

五月鄭伯突出奔蔡簒立而見逐於臣故以自奔為文
罪之也鄭世子忽復歸于鄭穀梁曰復正也許叔入于
許宜復國而不得其道故書字書入也公會齊侯于
艾魯嘗與齊絕矣至是復通好焉左氏以為謀定許
經無其事未可知也邾人牟人葛人來朝為天王崩
而相朝故貶也或曰旅朝諸侯事天子之禮魯不當
旅朝其義上僭所以責之重也秋九月鄭伯突入于
櫟左氏曰因櫟人殺檀伯而遂居櫟求復國也既入

于櫟則其國已復矣書入書名所以示義不容也冬十有一月公會宋公衛侯陳侯于袤伐鄭將納厲公也右篡非正也 十有六年春正月公會宋公蔡侯衛侯于曹夏四月公會宋公衛侯陳侯蔡侯伐鄭納厲公也秋七月公至自伐鄭左氏曰用飲至之禮也伐鄭非正也書飲至譏也冬城向志大役也十有一月衛侯朔出奔齊惠公朔也 十有七年春正月丙辰公會齊侯紀侯盟于黃左氏曰平齊紀且謀衛故也二月丙午公及邾儀父

盟于趙左氏曰尋隱元年蔑之盟也夏五月丙午及齊師戰于奚左氏曰齊人侵魯疆也齊魯交兵之始也六月丁丑蔡侯封人卒以赴書也秋八月蔡季自陳歸于蔡歸順詞也蔡人召季於陳而立之也癸巳葬蔡桓侯以會書也諸侯葬皆稱公今稱侯從其告也及宋人衛人伐邾侮弱也冬十月朔日有食之紀變也十有八年春王正月前此不書王正月此又書王何也疑皆史之舊也胡氏曰桓公之歿年仲尼以王法誅之也腐詞

也桓公弑君不待王不王而其惡自見也仲尼何所恃而誅之也公會齊侯於濰公與夫人姜氏遂如齊夏四月丙子公薨于齊丁酉公之喪至自齊禮父母不在女不歸寧桓公不能以禮閑其妻與之如齊齊侯通焉已為公子彭生所乘而薨焉患自掇也春秋不書所以為內諱也秋七月事闕也冬十有二月葬我君桓公穀梁曰君弑賊不討不書葬此其言葬何也不責踰國而討于是也齊強非已所討也

春秋億卷一

欽定四庫全書

春秋億卷二

明 徐學謨 撰

莊公

元年春王正月不書即位史闕也左氏曰文姜出故也
三月方遜何妨正月即位也公穀皆曰君弑子不言即
位也夫桓公何以言即位也胡氏曰內無所承上不請
命也魯之書即位者豈皆內有所承上有所請也皆意

之也三月夫人孫于齊左氏曰不稱姜氏絕不為親禮也公羊曰孫猶孫也內諱奔也夏單伯逆王姬公羊曰單伯者何吾大夫之命乎天子者也可何不稱使天子召而使之也逆之者何使我主之也天子嫁女於諸侯必使諸侯同姓者主之諸侯嫁女於大夫必使大夫同姓者主之也秋築王姬之館于外有三年之喪天王於義不當使之主有不戴天之讎莊公於義不可為之主公不忍便以禮接於廟又不敢逆天子之命於是乎委

曲周旋築館于外當亦合乎宜故穀梁曰築之外變之
正也莊公當此非不知齊之為讎而實有所難辭者奉
天王之命為同姓之親使與之主婚周之同姓孰親於
魯而可辭於王也冬十月乙亥陳侯林卒以赴書也王
使榮叔來錫桓公命穀梁曰禮有受命無來錫命錫命非
正也似也書之示周弱也王姬歸於齊公羊曰何以書
我主之也齊師遷紀邢鄆公羊曰遷之者何取之也
以稱師知取之也著齊之強也以來告書也 二年春

王二月葬陳莊公以會書也夏公子慶父帥師伐於餘
丘慶父帥師即輦帥師之類也著擅也此何以不去公
子故曰書公子不書公子皆仍史之文也非仲尼筆削
之也秋七月齊王姬卒以魯主婚來赴也冬十有二月
夫人姜氏會齊侯于禚左傳曰書奸也疑附會之詞也
會者不當會也穀梁曰婦人不逾境逾境非禮也似也
乙酉宋公馮卒以赴書也三年春王正月溺會齊侯
伐衛衛同姓也溺會仇讐之齊而伐之又不言使擅也

其惡不待貶而自著也夏四月葬宋莊公以會書也五月葬桓王志一統也公羊曰不言崩而言葬改葬也亦意之也秋紀季以鄆入於齊紀非齊敵而紀季以鄆入齊懼于齊也書之甚齊之強也冬公次于滑謀救紀也胡氏責莊以不能救紀抑齊齊強魯弱不量力之說也四年春王二月夫人姜氏享齊侯于祝丘先是會非也享之又甚矣三月紀伯姬卒外夫人不卒以內女來赴也夏齊侯陳侯鄭伯遇于垂以告書也紀侯大去其

國穀梁曰大去者不遺一人之辭也紀侯賢而齊滅之
也不言滅而曰大去其國不使小人加乎君子也春秋
閔之也而公羊以為齊襄復九世之讐於紀不言滅紀
為齊襄諱也春秋雖大復讐之義不請於王而私滅人
之國安得善齊襄而為之諱也六月乙丑齊侯葬紀伯
姬紀亡矣而伯姬在殯故齊侯葬之也胡氏所謂加刃於人
而以手摩之是也書之以重齊罪也秋七月無事闕也冬公
及齊人狩于榘公羊曰齊人者齊侯也齊侯則其稱人何諱

與誓狩也非也人衆詞也 五年春王正月無事闕也

夏夫人姜氏如齊師如不宜如也杜氏曰書姦也附會之詞也秋郕黎來來朝公羊曰倪者何小邾婁也黎來者何名也其名何微國也微國能脩朝禮善之也冬公會齊人宋人陳人蔡人伐衛三傳曰納衛侯朔也人者衆詞也穀梁曰人諸侯人公也其人公何也逆天王之命也夫既逆天王之命不必人之而後為貶也 六年春王正月王人子突救衛諸侯逆王命而納朔王不能討

而書救弱之之詞也書王人子突公穀皆善其救衛而
字之也抑何據而知子突之為字也不詳書法而以名
字相附會者說春秋者之謬也夏六月衛侯朔入于衛
秋公至自伐衛朔書入逆詞也公書至不宜至而至也
至飲至也螟志災也冬齊人來歸衛俘公穀皆以俘為
寶衛賂之也黨逆拒命而受賂不道之甚也譏也 七
年春夫人姜氏會齊侯于防書會不宜會也夏四月辛
卯夜恒星不見夜中星隕如雨志變也秋大水無麥苗

志災也冬夫人姜氏會齊侯于穀書會不宜會也 八

年春王正月師次于郎以俟陳人蔡人穀梁註曰時陳
蔡欲伐魯出師以待之也杜氏以期共伐邲陳蔡不至
故駐師以待之也詞無褒貶也甲午治兵承郎之次也
夏師及齊師圍邲邲降于齊師伐國無名書降甚齊之
強也秋師還左氏以為善魯莊非也師何名而出何名
而還也冬十有一月齊無知弑其君諸兒襄公淫而被
弑無知逆矣而襄公有弑道焉直書之交戒也 九年

春齊人殺無知杜氏曰無知弑君而立未列於會故不
書爵也胡氏曰殺無知者雍廩也而曰齊人討賊之詞
也言衆也似也公及齊大夫盟于莒齊亂無君公與齊
大夫盟謀納子糾也夏公伐齊納子糾齊小白入於齊
公羊曰伐而言納者猶不能納也去公子以為君前臣
名鑿也齊小白不去國氏也入於齊明小白當立也胡
氏之說是也所謂不稱公子內無所承上不稟命以王
法絕之亦鑿也二公子俱以出亡返國故齊人來告無

公子也秋七月丁酉葬齊襄公國亂故葬緩也八月庚申及齊師戰于乾時我師敗績伐齊而納子糾是以書敗也胡氏例以郎之戰云內不言敗此其言敗者為與讐戰雖敗亦榮也鑿也內何嘗諱敗也郎之師但云來戰而已何以知其敗而諱之也九月齊人取子糾殺之既書取又書殺甚齊之詞也仲尼之指不在魯也而公穀二傳以不能庇子糾責魯非也冬浚洙紀大役也

十年春王正月公敗齊師於長勺長勺魯地齊人來戰

而敗之也二月公侵宋侮弱也三月宋人遷宿魯偏之也夏六月齊師宋師次于郎公敗宋師于乘丘齊之師次于郎敵加於已也而魯敗之應兵也秋九月荆敗蔡師于莘以蔡侯獻舞歸書荆滑夏之始也以蔡侯獻舞歸荆來告也獻舞蔡侯名也書名公穀皆言以亡國絕之也它日楚滅夔以夔子歸何以不名也胡氏曰夔無罪也然則蔡何以知其有罪也名不名俱從其告也不必曲為之詞也冬十月齊師滅譚譚子奔莒甚齊之強

也胡氏曰滅而書奔責不死位鑿也 十有一年春王

正月事闕也夏五月戊寅公敗宋師于鄆左傳曰宋為
乘丘之役故侵我公禦之宋師未陳而薄之敗諸鄆也
鄆魯地也秋宋大水胡氏曰凡外災告則書也冬王姬
歸于齊穀梁曰其志過我也 十有二年春王三月紀

叔姬歸于鄆鄆紀邑也紀亡矣而叔姬仍歸于鄆以守
宗廟禮也公羊曰隱之也夏四月事闕也秋八月甲午
宋萬弑其君捷及其大夫仇牧胡氏曰君弑而大夫死

于其難者書之示勸也書仇牧宋告也不書太宰督宋未告也冬十月宋萬出奔陳不書殺萬者宋不告也胡氏以為罪陳之不能正天討鑒也 十有三年春齊侯

宋人陳人蔡人邾人會於北杏書齊桓主盟之始也左氏曰以平宋亂也書人衆詞也胡氏曰桓非受命之伯諸侯自相推戴故四國稱人以誅始亂也夫桓公私伯不削其爵而顧削四國之爵是以首惡之罪加于脅從也春秋魯史也非周史也安知桓之不請命也而桓知

尊周室焉即孔子與之矣而胡氏必欲誅之何也夏六月齊人滅遂左氏曰北杏之盟遂人不至也書滅甚齊之強也秋七月事闕也冬公會齊侯盟于柯左氏曰始及齊平也十有四年春齊人陳人曹人伐宋背北杏之盟也書人衆詞也夏單伯會伐宋單伯周之卿也會四國之師伐宋者左氏曰齊請師于王也而胡氏始終以單伯為魯大夫比于暈帥師之類不知何所據也秋七月荆入蔡書入罪荆也冬單伯會齊侯宋公衛侯鄭

伯于鄆杜氏曰齊平宋亂歸功于王故赴以單伯會諸侯為文疑是也 十有五年春齊侯宋公陳侯衛侯鄭

伯會于鄆尋前會也夏夫人姜氏如齊如者不宜如也

秋宋人齊人邾人伐郕宋序齊上伐邾宋志也鄭人侵

宋左氏曰有鍾鼓曰伐無鍾鼓曰侵潛帥而掩人之不

備書侵以病鄭也冬十月事闕也 十有六年春王正

月事闕也夏宋人齊人衛人伐鄭宋先齊宋主兵也以

鄭侵宋故也秋荆伐鄭荆患自蔡又鄭荆漸強也冬十

有二月會齊侯宋公陳侯衛侯鄭伯許男滑伯滕子同盟于幽書齊桓始主盟也不書公胡氏引程氏言魯首叛盟諱之也齊伐魯叛盟在十九年而以仲尼逆魯而責之者迂詞也然則柰何不書公仍史之闕也邾子克卒以赴書也穀梁曰子進之也邾故子也誰進之也

十有七年春齊人執鄭詹左氏曰執鄭詹鄭不朝也書執甚齊之強也夏齊人殲于遂左穀皆云齊人滅遂遂人饗齊戍醉而殺之齊人殲焉書殲甚齊之強也秋鄭

詹自齊逃來詹執而逃逼齊之強也胡氏責以不死過也公羊曰甚佞尤鑿也冬多麋麋魯所有也書多麋則害稼災也十有八年春王三月日有食之不書日官失之也穀梁曰夜食也夜食又何以書也夏公追戎于濟西戎來而追之也公穀曰大之也秋有貳穀梁曰一有一亡曰有貳射人者也志災也冬十月事闕也十有九年春王正月夏四月皆事闕也秋公子結媵陳人之婦于鄆遂及齊侯宋公盟時齊宋謀伐魯公子結媵

婦而遂與諸侯盟書擅也公羊曰大夫出竟有可以安社稷利國家者專之可也非也夫人姜氏如莒如者不當如也冬齊人宋人陳人伐我西鄙書伐我有罪也西鄙志遠也二十年春王二月夫人姜氏如莒如莒者再也莒非婦人之所如也况再乎夏齊大災齊火公羊曰病也以告書也秋七月事闕也冬齊人伐我師正也二十有一年春王正月事闕也夏五月辛酉鄭伯突卒以赴書也秋七月戊戌夫人姜氏薨先是如莒不言

入而薨疑薨于莒非正也冬十有二月葬鄭厲公以會
書也二十有二年春王正月肆大青左氏疏曰國有大
患非赦不解此以文姜薨而赦也胡氏以為譏何也癸
丑葬我小君文姜祔于廟始書葬也子無絕母之義也
陳人殺其公子禦寇公羊註云殺君之子重也稱公子
以非陳人之所當殺也夏五月事闕也秋七月丙申及
齊高侯盟于防不書公穀梁曰高侯仇也諱魯之弱也
冬公如齊納幣公羊曰親納幣非禮也于是公即位二

十二年矣而始謀娶焉書之譏失時也 二十有三年

春無王正月史闕也公至自齊不宜如則不宜至也祭
叔來聘祭叔天子之內臣也不言使省文也疑非私聘
也夏公如齊觀社公羊曰諸侯越竟觀社非禮也註云
社社祭也公至自齊不宜如亦不宜至也君出入必書
慎之也荆人來聘著始通魯也公及齊侯遇于穀穀梁
曰及者內為志焉耳遇者志相得也蕭叔朝公穀梁曰
微國之君未爵命者其不言來於外也朝于廟正也于

外非正也秋丹桓宮楹諸侯宜黜堊而丹之書侈也穀
梁曰以飾夫人蓋謂娶齊女而誇示之疑無據也冬十
有一月曹伯射姑卒以赴書也十有二月甲寅公會齊
侯盟于扈莊娶失時疑齊女待年于國也而胡氏以為
制于文姜此何據也扈之盟傳不載其事姑闕疑可也
公羊曰危之也何危爾我貳也註云莊有淫泆汙貳之
行尤無據也二十有四年春王三月刻桓宮桷刻不當
刻也書侈也御孫之諫或可徵也非專飾夫人也葬曹

莊公以會書也夏公如齊逆女秋公至自齊公羊註云
諱淫故使若以得禮書也不知何所據也八月丁丑夫
人姜氏入書入著始也公羊傳以為姜氏要公不與公
俱入蓋以孟任故丁丑入而明日乃朝廟不知何所據
也戊寅大夫宗婦覲用幣大夫與宗婦之見小君禮也
而不棗栗不服脩而用幣非禮也諸侯之娶恒事也而
詳於莊之娶書納幣書過于穀書盟于扈書逆女書姜
氏入書覲用幣著魯弱而事齊之謹也以基內孽也大

水書災也冬戎侵曹曹羈出奔陳赤歸于曹左氏註以羈為曹世子而公羊以為曹大夫赤歸于曹左氏註云赤曹僖公蓋為戎所納故曰歸無傳不可考也何以書著戎強而滑夏也以來告書也胡氏曰雖以國氏皆不書爵為居正者之戒鑒也郭公史無文闕之可也

二十有五年春不書王正月史闕也陳侯使女叔來聘左氏曰始結陳好也夏五月癸丑衛侯朔卒以赴書也六月辛未朔日有食之鼓用牲于社日食而用幣于社伐

鼓於朝禮也而用牲又鼓於社非禮也胡氏之說是也
伯姬歸于杞不書逆史略之也胡氏以為非卿逆之其
姓名不登于史冊則書歸以志禮之失也疑求之過也
秋大水鼓用牲于社于門左氏曰凡天災有幣無牲非
日月之眚不鼓鼓而用牲非禮也冬公子友如陳報女
叔之聘也亦不言使而知其非私聘也 二十有六年
春不書王正月史闕也公伐戎夏公至自伐戎書伐戎
師正也曹殺其大夫不稱名史略之也而胡氏以為書

殺甚曹之擅也秋公會宋人齊人伐徐宋主兵也冬十有二月癸亥朔日有食之書災也二十有七年公會杞

伯姬于洮伯姬莊公女也左氏曰公會于洮非事也非事譏也夏六月公會齊侯宋公陳侯鄭伯同盟于幽諸侯推齊為盟主也同盟同尊周也秋公子友如陳葬原仲魯使之也胡氏曰私行也魯與陳方睦先是公子友如陳報女叔之聘亦未嘗稱公使之也而胡氏無貶詞此何據而曰私行也私行何以不去公子也冬杞伯姬

來書歸寧也疑非貶詞也而胡氏以為不當來苛也莒
慶來逆叔姬穀梁曰諸侯嫁子于大夫主大夫以與之
來者接內也不正其接內故不與夫婦之稱也子嫁大
夫故稱叔姬而不書逆女耳而曰去其夫婦之稱者鑒
也杞伯來朝杞故侯也而稱伯穀梁註以為時王所絀
疑是也猶滕子來朝之類也公會齊侯于城濮謀討衛
也二十有八年春王三月甲寅齊人伐衛衛人及齊人
戰衛人敗績齊人以王命伐衛聲立子頹之罪衛不能

受而與齊戰故書及猶禦之也胡氏之說是也二國稱人衆詞也而穀梁以為微之也鑒也夏四月丁未邾子瑣卒以赴書也秋荆伐鄭公會齊人宋人邾婁人救鄭著齊桓之攘夷也凡書救善詞也冬築鄆鄆邑也故不書城書築焉紀役也大無麥禾臧孫辰告糴于齊善齊之能急病也二十有九年春新延廩饑而舉役非禮也夏鄭人侵許許無罪而侵之譏也秋有蜚公穀註皆言蜚南方臭惡之氣所生也何以書紀異也冬十有二月

紀叔姬卒叔姬我女也故書而胡氏以為不卒紀侯而卒叔姬見紀侯去國終不能自立鑿也城諸及防紀屢役也三十年春王正月事闕也夏師次于成穀梁曰救鄭也是時魯與齊睦安得而救鄭也疑助齊師取鄭也秋七月齊人降鄭降取之也甚齊之強也八月癸亥葬紀叔姬紀亡而葬之於鄆故書也九月庚午朔日有食之鼓用牲于社用牲非禮也冬公及齊侯過于魯濟穀梁曰過者志相得也左氏曰謀山戎也以其病燕故也

齊人伐山戎公羊曰稱人貶非也人衆詞也伐山戎勝
舉也何云貶也三十有一年春不書王正月史闕也
築臺于郎臺不當築築于郎尤厲民也夏四月薛伯卒
以赴書也築臺于薛不半歲而兩築臺於遠焉譏厲民
也六月齊侯來獻戎捷公羊曰過我而獻似也諸侯不
相遺俘書來獻不當獻也秋築臺于秦書屢役也譏厲
民也冬不雨周之冬夏之秋也不雨異也三十有二
年春城小穀志役繁也左氏曰為管仲也夏宋公齊侯

遇于梁丘左氏曰齊侯為楚之伐鄭之故請會於諸侯
宋公先至以來告書也秋七月癸巳公子牙卒傳曰季
友殺之也不言殺諱之也八月癸亥公薨于路寢路寢
者正寢也以正終書也冬十月己未子般卒般孟任
生莊公太子也先君未葬故不稱爵慶父使犛殺之不
書殺諱之也公子慶父如齊公子慶父弑般而奔齊不
書奔而書如諱之也狄伐邢著滑夏也

閔公

元年春王正月不書即位史闕也穀梁曰繼弑君不言即位也桓公繼弑君何以書即位也胡氏以為內無所承上不請命故不書即位春秋之書即位者豈皆內有所承上有請命者也齊人救邢書救善攘夷也夏六月辛酉葬我君莊公左氏曰亂故是以緩也秋八月公及齊侯盟于落姑左穀皆曰盟納季友也冬齊仲孫來公穀皆曰仲孫慶父而繫之齊非也左氏曰齊仲孫湫來省難似也胡氏據其傳有齊桓取魯之語而引孔子君使

臣以禮臣事君以忠之指無故而苛責齊之君臣鑒也
齊桓方九合諸侯而取魯之志疑無自而萌也 二年
春王正月齊人遷陽齊人迫遷之也著其強也夏五月
乙酉吉禘于莊公杜氏曰三年喪畢致新死者之主於
廟廟之遠主當遷入桃因是大祭以審昭穆謂之禘莊
公喪制未闋時別立廟廟成而吉祭又不於大廟故詳書
以示譏也三傳義同譏書吉譏書莊公也而不譏禘何
也惟程氏曰天子曰禘諸侯曰祫則魯當祫而不當禘

也明堂位曰禘始于魯公而成王賜之以寵周公也然
隱桓莊之際禘何以不見于經也林氏曰惠公請之也
則又非始於魯公也疑其說之有所據也秋八月辛丑
公薨公羊曰慶父弑之也何以書薨諱之也九月夫人
姜氏孫于邾與聞弑也故諱奔為遜也公子慶父出奔
莒穀梁曰其曰出絕之也冬齊高子來盟穀梁曰其來
喜之也其曰高子貴之也十有二月狄入衛書入而不
言滅諱也鄭棄其師自棄也

春秋億卷二

欽定四庫全書

經部

春秋億卷

三四

詳校官監察御史_臣孫家賢

給事中_臣溫常綬覆勘

總校官原任中允_臣王燕緒

校對官中書_臣牛稔文

謄錄監生_臣任應銑

欽定四庫全書

春秋億卷三

僖公

明 徐學謨 撰

元年春王正月不書即位史闕也左氏曰出故也出則何以不書即位也公穀皆曰繼弑君不言即位也夫桓公何以言即位也胡氏曰內無所承上不請命也魯之書即位者豈皆內有所承上有所請也皆意之也齊師

宋師曹師次於鼎北救邢莊三十二年狄伐邢邢國遂滅而齊率諸侯之師救之書救善之也書次以觀釁而動也書師亦衆詞也穀梁曰言次非救也而胡氏本之以譏齊之緩於急難苛詞也齊桓以前無書救者聖人之情可得而見也夏邢遷於夷儀避狄難也疑諸侯遷之也齊師宋師曹師城邢何以書美齊桓之興滅也秋七月戊辰夫人姜氏薨于夷齊人以歸三傳皆曰齊桓召而殺之也不書殺內諱也書薨于夷非薨地也書齊

人以歸不宜自齊而歸之也楚人伐鄭荆何以稱楚杜氏曰荆始改號楚也似也伐鄭左氏曰即齊故也書人衆詞也而胡氏以為惡其伐鄭而人之非也義係伐鄭而人不人無與也八月公會齊侯宋公鄭伯曹伯邾人于櫓左氏曰謀救鄭也九月公敗邾師于偃櫓之會公與邾會也而又伐邾傳不載其故倏而會倏而伐不貶而自貶也冬十月壬午公子友帥師敗莒師于鄆獲莒拏按傳莒人殺慶父以求賂魯人不與莒來伐魯公子

友敗之而獲莒拏莒拏莒子之弟也書而善之也胡氏
以為不宜與之戰而欲以詞命喻却之迂詞也十有二
月丁巳夫人氏之喪至自齊不書姜者史闕也三傳皆
以為不言姜與弑二君也既以弑二君而去其姓則前
此當弑之時何以不去其姜也故曰史闕也非仲尼削
之也 二年春王正月城楚丘左氏曰諸侯城楚丘而
封衛焉若諸侯城之則春王正月之下必有闕文無闕
文而書城楚丘是魯之役也疑非衛地也而胡氏遂以

專封病齊桓焉於經何所據也夏五月辛巳葬我小君
哀姜謚哀疑齊殺之故也虞師晉師滅下陽滅下陽者
傳皆稱晉也而先虞賂故也貪賂之與貪國孰罪也晉
滅人之邑而不受罪仲尼無是書也傳皆襲孟子之說
也下陽之滅疑虞主兵而藉晉之衆也秋九月齊侯宋
公江人黃人盟于貫左氏曰服江黃也冬十月不雨紀
異也楚人侵鄭責叛也三年春王正月不雨夏四月
不雨紀異也徐人取舒舒為楚黨取之以通齊桓伐楚

之徑春秋以其效順于侯國故書人書取也六月雨志喜也秋齊侯宋公江人黃人會于陽穀左氏曰謀伐楚也冬公子友如齊涖盟公羊曰往盟乎彼也蓋審師期也楚人伐鄭三年之間歲受楚兵于此見齊之伐楚不容緩也四年春王正月公會齊侯宋公陳侯衛侯鄭伯許男曹伯侵蔡蔡潰遂伐楚次于陘胡氏曰潛師掠境曰侵侵蔡者奇也聲罪致討曰伐伐楚者正也遂者繼事之詞而有專意又曰楚雖暴橫憑陵上國

齊不請命擅合諸侯豈所謂為天吏以伐之乎春秋以
義正名而樂與人為善書遂伐楚譏其專也書次于
陟楚屈完來盟于師盟于召陵序其績也此說似太
拘泥桓公有志于伐楚定謀非一日矣而以侵蔡召
諸侯書侵蔡遂伐楚志不在蔡也觀其仗義執言楚
人服罪王綱之克振桓公師出有名也春秋據事直書
以予之且齊桓當日亦未必不請命于王而伐楚春秋
非周史也胡氏何以知其不請于王也夏許男新臣卒

卒于師故書之也楚屈完來盟于師盟于召陵召陵之盟美齊桓之禮服楚也屈完來不書楚使省詞也公羊曰尊屈完也以當桓公也穀梁曰不言使權在完也此皆以傳意之也非春秋指也齊人執陳轅濤塗以濤塗誤軍道而執之也人衆詞也書執甚齊之強也秋及江人黃人伐陳以濤塗誤軍道之故執其大夫而伐其國益甚齊之強也八月公至自伐楚飲至于廟也葵許穆公以會書也冬十有二月公孫茲帥師會齊人宋人衛

人鄭人許人曹人侵陳陳以轅濤塗之故既執之矣伐之矣至是又帥諸侯之師侵之齊桓之得于盟楚而失于凌陳也書之甚齊也五年春晉侯殺其世子申生來告也申生自縊而書殺何也惡晉侯之以譖殺其子也杞伯姬來朝其子杜氏曰伯姬歸寧成風因見其子於公時子年十歲左右未能行朝禮故繫於母而曰朝其子也夏公孫茲如年無傳杜氏曰叔孫戴伯娶於年卿非君命不越竟故奉公命聘於年因自為逆也公及齊

侯宋公陳侯衛侯鄭伯許男曹伯會王世子於首止王世子在首止而諸侯往會之也故不序王世子於諸侯之上也非胡氏所謂天王欲屈遠其子使次乎下示謙德鑿也秋八月諸侯盟於首止王將以愛易世子首止之盟齊桓欲定其位也鄭伯逃歸不盟專已背衆故書逃歸也而胡氏以為受制於王命既曰王命何以直書逃歸也楚人滅弦弦子奔黃書滅書奔甚楚之強也九月戊申朔日有食之紀災也冬晉人執虞公前書滅下

陽先號寔號滅之也今書晉人執虞公晉執之也甚晉之強也 六年春王正月史闕也夏公會齊侯宋公陳侯衛侯曹伯伐鄭圍新城聲逃歸之罪也秋楚人圍許諸侯遂救許即伐鄭之諸侯也舍新城之圍而遂救許善齊桓也冬公至自伐鄭穀梁曰其不以救許致何也大伐鄭也以伐鄭出則以伐鄭至也 七年春齊人伐鄭新城之役未竟至是又伐鄭也夏小邾子來朝邾未嘗書子至是以爵通公羊註曰齊桓白天子進之也于

三傳無所據也疑邾故子爵也從其來告之文也鄭殺其大夫申侯以陳濤塗之譖也罪專殺也秋七月公會齊侯宋公陳世子款鄭世子華盟于甯母左氏曰謀鄭故也上書鄭世子求介于大國以弱其國管仲勸齊侯辭焉而鄭卒求盟于齊也曹伯班卒以赴書也公子友如齊無傳疑尋盟也冬葬曹昭公以會書也八年春王正月公會王人齊侯宋公衛侯許男曹伯陳世子款盟于洮左氏曰惠王崩襄王惡大叔帶之難懼不立不

發喪而告難于齊至是盟于洮謀王室也王人序於諸
侯之上尊王也鄭伯乞盟新服未與會故不序列也夏
狄伐晉書滑夏也秋七月禘于大廟用致夫人左氏曰
夫人哀姜也公羊以為齊之媵女也而穀梁以為成風
也皆不可考也禘者不宜禘也不宜禘則不宜用致夫
人是春秋之義也冬十有二月丁未天王崩左氏曰難
故也是以緩杜氏以惠王前年閏月崩以今年十二月
丁未告也九年春王三月丁丑宋公禦說卒以赴書

也夏公會宰周公齊侯宋子衛侯鄭伯許男曹伯于葵
丘宋何以稱子也左氏曰凡在喪公侯曰子也似也秋
七月乙酉伯姬卒穀梁曰內女也未適人不卒此何以
卒也許嫁笄而字之死則以成人之喪治之似也九月
戊辰諸侯盟于葵丘胡氏曰會盟同也而再言葵丘美
之也按會以夏盟以九月地同而事殊非書之重辭之
複也甲子晉侯詭諸卒以赴書也冬晉里克殺其君之
子奚齊穀梁曰其君之子云者國人不子也國人不子

何也不正其殺世子申生而立之也非也奚齊固不當立也是先君之罪也若里克者先君之臣也烏得而殺其子也故稱君之子也不言弑何也未逾年之君也書弑嫌與弑成君同也 十年春王正月公如齊朝齊也狄滅溫溫子奔衛書猾夏也晉里克弑其君卓子及其大夫荀息卓子稱弑者成君也書及其大夫荀息者嘉死國也夏齊侯許男伐北戎書桓公攘夷也晉殺其大夫里克惠公殺之也以其弑二君一大夫也穀梁曰殺

之不以罪非也冬大雨雪周之冬夏之秋也大雨雪紀異也十有一年春不書王正月史闕也晉殺其大夫平鄭父平鄭父里克之黨也故并殺之也夏公及夫人姜氏會齊侯于陽穀夫婦胥出而會諸侯非禮也秋八月大雩書旱也冬楚人伐黃以強偪之也胡氏曰罪桓公之不能救於經義何取也書救固嘉之也遠不能救者未可責之備也齊雖伯不能日厲兵於外也十有二年春王正月庚午日有食之不書朔官失之也夏楚

人滅黃書滅甚楚也秋七月事闕也冬十有二月丁丑
陳侯杵臼卒以赴書也 十有三年春不書王正月史
闕也狄侵衛書侵暴也夏四月葬陳宣公以會書也公
會齊侯宋公陳侯衛侯鄭伯許男曹伯於鹹左氏曰會
于鹹淮夷病杞故且謀王室也秋九月大雩紀旱也冬
公子友如齊聘也 十有四年春不書王正月史闕也
諸侯城緣陵緣陵杞邑辟淮夷遷都于緣陵諸侯城之
以衛杞也夏季姬及鄆子過于防使鄆子來朝季姬魯

女也而鄆之夫人也十五年始歸于鄆今書及鄆子遇于防使鄆子來朝言使鄆子無朝意也胡氏以為魯公鍾愛其女使自擇配故得與鄆子遇于防而遂以季姬歸之也本公羊之說是意之也魯秉禮之國而僖公賢君安得為此黷禮也左氏曰鄆季姬來寧公怒鄆子之不朝夏遇于防而使來朝杜氏曰公絕鄆昏既來朝而還之故下年書歸更嫁之文似也秋八月辛卯沙鹿崩沙鹿邑也何以書崩襲邑也襲陷入地也事不在魯而

書之公羊曰為天下紀異也狄侵鄭漸偪王室也冬蔡
侯肸卒以赴書也穀梁疏曰肸父哀侯為楚所執肸不
附中國而常事父仇故惡之而不書日鑒也 十有五

年春王正月公如齊杜氏曰諸侯五年再相朝禮也楚
人伐徐著楚強也三月公會齊侯宋公陳侯衛侯鄭伯
許男曹伯盟於牡丘遂次於匡公孫敖帥師及諸侯之
大夫救徐穀梁曰善救徐似也胡氏曰書盟於牡丘見
諸侯之不協也書次于匡見霸主號令之不嚴也書大

夫帥師而諸侯不行見桓德之衰也嗟乎書盟書次書救不一書而足者仲尼與桓之意藹然也胡氏必責之備何也夏五月日有食之左氏曰不書日與朔官失之似也秋七月齊師曹師伐厲左氏曰伐厲救徐也八月螽紀災也九月公至自會公羊曰桓公之會不致此何以致久也師出而飲至常也有不書者疑更有詳略也似不必求之過也季姬歸于鄆中絕而復歸非始歸之也已卯晦震夷伯之廟夷伯魯大夫展氏之祖父夷謚

伯氏也左氏曰震夷伯之廟罪之也於是展氏有隱慝焉冬宋人伐曹左氏曰討舊怨也莊十四年曹嘗伐宋也楚人敗徐於婁林穀梁曰夷狄相敗志也十有一月壬戌晉侯及秦伯戰於韓獲晉侯韓之戰胡氏本左傳之文以晉侯背施幸災貪愛怒鄰懸度春秋之指專罪晉而恕秦春秋無是意也以其來告于魯而書之魯史也著秦之始強也所謂春秋無義戰是也何據而與秦以彼善于此也不信經而信傳之過也十有六年春

王正月戊申朔隕石于宋五是月六鷁退飛過宋都左
氏曰隕石于宋五隕星也六鷁退飛風也皆宋異也此
何以書來告書也謹災也三月壬申公子季友卒公羊
曰其稱季友何賢也季友于僖公有翼戴之勤誠賢也
而不於書季友賢之也前乎此未嘗不稱季友也胡氏
曰大夫卒而書名此稱氏僖公不勝私情以異賞報之
似無據也夏四月丙申鄆季姬卒以內女來告書也胡
氏何據而言僖公愛女令自擇配書其卒而奪其葬也

秋七月甲子公孫茲卒穀梁曰大夫日卒正也冬十有
二月公會齊侯宋公陳侯衛侯鄭伯許男邢侯曹伯于
淮左氏曰謀鄆且東略也 十有七年齊人徐人伐英
氏左氏曰以報十五年婁林之役也夏滅項不書何國
滅之疑史有闕文也公穀皆以為齊滅之也承伐英氏
而書之疑是也左氏以為魯滅之也淮之會公有諸侯
之事未歸而取項也春秋于魯之取國皆諱其滅如取
鄆取邾取郕是也此書滅疑非魯也胡氏曰僖公在會

季孫所為故不與之諱也此尤無據之甚也秋夫人姜氏會齊侯于卞左氏曰齊以滅鄆之故止公故聲姜以公故會齊侯于卞傳疑也九月公至自會師出而飲至常事也杜氏以左氏傳諱止為至無可徵也冬十有二月乙亥齊侯小白卒以盟主赴也十有八年春王正月宋公曹伯衛人邾人伐齊齊桓常屬公子昭于宋即孝公也桓薨而無虧立宋以故帥諸侯之師伐齊也夏師救齊師魯師也穀梁曰善救齊也以無虧長當立也五

月戊寅宋師及齊師戰於甌齊師敗績書敗績以齊人之不能國而殺無虧也狄救齊凡書救皆與詞也即狄亦與也秋八月丁亥葬齊桓公孝公立而始葬故緩也冬邢人狄人伐衛伐衛救齊也十有九年春王三月宋人執滕子嬰齊從告也告而有名不得削之也告而無名不得筆之也而胡氏以為名與不名知其罪之在也使告而無名仲尼安得盡悉諸侯之名而書之乎春秋之法皆直書而自見也與國而書執罪在宋也宋無

王也乃云滕不與衣裳之會而執之是時齊桓方伯何以不執之也且周千八百諸侯而與衣裳之會者無幾安得而盡執之也夏六月宋公曹人邾人盟于曹南曹雖與盟而猶不肯服故不以國地而以曹南也鄆子會盟于邾不及曹南之盟乃會之于邾也已酉邾人執鄆子用之公穀曰用之者用之社也蓋叩其鼻以血社也為其會後也理或然也左氏曰殺而用祭誣也秋宋人圍曹討不服也宋襄急于招懷而執滕圍曹知其伯之

不終也衛人伐邢左氏曰報菟圃之役也冬會陳人蔡人楚人鄭人盟于齊宋襄暴虐故思齊桓盟于齊也梁亡左氏曰秦取之也穀梁曰梁亡自亡之也疑無據也亦鄭棄其師之類是也皆史之闕文也二十年春不書王正月者史闕也新作南門紀役也南門者法門也穀梁曰作為也有加其度也言新有故也疑詞無褒也左氏曰書不時也周之春夏之冬也正用民力之時以為不時何也夏郕子來朝郕姬姓始來朝也五月乙巳

西宮災紀異也西宮不知何宮而穀梁以為閔宮意之也鄭人入滑左氏曰滑人叛鄭而服于衛故鄭師入之也書入貶也秋齊人狄人盟于邢左氏曰為邢謀衛難也于是衛方病邢也冬楚人伐隨以叛楚也二十有一年春不書王正月史闕也狄侵衛為邢故也宋人齊人楚人盟于鹿上宋襄主盟也夏大旱紀災也秋宋公楚子陳侯蔡侯鄭伯許男曹伯會于孟執宋公以伐宋宋小國而圖伯故諸侯背之而楚子遂執宋公于會而

伐之書之甚楚強也而宋之不能為盟主自見也冬公伐邾滅須句也楚人使宜申來獻捷獻宋捷也不言宋諱宋執也十有二月癸丑公會諸侯盟于薄釋宋公楚釋之也不言楚釋之不與楚專釋也穀梁之說是也此或仲尼之義也二十有二年春公伐邾取須句須句成風家也為邾所滅僖伐邾取須句而反其君焉左氏曰禮也胡氏以為不請于天王而書取焉求之過也夏宋公衛侯許男滕子伐鄭怒鄭至楚故伐之也秋八月丁

未及邾人戰于升陘以須句故也書戰諱魯敗也敗故
不書公也冬十有一月己巳朔宋公及楚人戰于泓宋
師敗績宋襄不度德量力而自取其敗也春秋於宋書
執書敗書圍不成其為霸也二十有三年春不書王

正月史闕也齊侯伐宋圍緡書伐書圍春秋亦因其事
而書之也齊襄乘泓之敗而伐宋圍邑焉胡氏曰貶也
而齊桓公之於新城亦書伐書圍而不言貶也解之曰
美惡不嫌同辭也既同辭而美惡異焉是仲尼設覆以

侯人之射恐不然也夏五月庚寅宋公茲父卒以赴書
也不葬史略之也穀梁曰失民也鑿也秋楚人伐陳以
其貳于宋也冬十有一月杞子卒杞伯也而稱子疑亦
時王所絀也左氏曰子杞夷也謂成公始行夷禮也胡
氏從其說以為仲尼貶之也成公之始行夷禮不見於
經後世安知仲尼之夷杞而貶之也此信傳不信經之
過也二十有四年春不書王正月史闕也夏狄伐鄭書
侵暴也秋七月事闕也冬天王出居于鄭左氏曰辟母

弟之難也書出紀變也晉侯夷吾卒以赴書也不書葬
史略之也公羊註以為簒不書葬是意之也二十有五
年春王正月丙午衛侯燬滅邢燬衛侯名也三傳皆以
為滅同姓而絕之也晉滅虞楚滅夔亦同姓也而未嘗
書名此何以名之而胡氏遂曲為之詞以虞公貪賂自
取晉滅荆楚僭王滅夔何誅以解之同罪而異書仲尼
必不然也書名仍史之文也義係滅邢而不在于名不
名者春秋之義也夏四月衛侯燬卒以赴書也宋蕩伯

姬來逆婦伯姬魯女為宋大夫蕩氏妻也自為其子逆婦
書婦穀梁曰緣姑言之之辭也婦人既嫁不逾竟來逆婦
非正也宋殺其大夫不名史略之也秋楚人圍陳納頓子
於頓頓迫於陳而出奔楚故楚圍陳以納頓子也與楚也
胡氏曰納頓者不與納也蓋謂中國諸侯不能納而楚納
之也夫諸侯既不能納而楚復不納則頓將亡疑責之過
也蔡衛文公以會書也冬十有二月癸亥公會衛子莒慶
盟于洮脩文公之好也衛侯稱子以在喪也 二十有六

年春王正月己未公會莒子衛甯速盟于向穀梁曰公不
會大夫其曰甯速何也以其隨莒子可以言會也齊人侵
我西鄙公追齊師至鄙弗及胡氏曰前書齊人見其弱
以誘魯也後書齊師者是伏其衆以邀魯也鑿也齊人者
即帥師者也書侵罪齊也魯追之應兵也弗及弗窮追也
皆善魯也夏齊人伐我北鄙罪齊也衛人伐齊以魯故也
公子遂如楚乞師書乞哀辭也著屈于夷也秋楚人滅夔
以夔子歸甚楚強也滅國不名仍史之文也冬楚人伐宋

圍閔楚人出師為魯伐齊而中道以伐宋故伐圍兼書以責楚也公以楚師伐齊取穀公至自伐齊乞師於夷而取人之邑不貶而自貶也書至以反至書常詞也何謂危之也二十有七年春不書王正月史闕也杞子

來朝莊二十七年杞稱伯此何以子也左氏曰卑其用夷禮也是意之也非子而仲尼安得而子之也疑亦時王黜之也夏六月庚寅齊侯昭卒左氏曰有齊怨不廢喪紀禮也秋八月乙未葬齊孝公以會書也乙巳公子遂

帥師入杞左氏曰責無禮也書入甚魯也冬楚人陳侯
蔡侯鄭伯許男圍宋楚子也而曰人何也楚僭王久矣
必以王號會諸侯故不與而人之也諸侯信蠻荆而伐
中國著貶十有二月甲戌公會諸侯盟於宋解宋圍也
二十有八年春不書王正月史闕也晉侯侵曹晉侯伐
衛侵曹伐衛不書遂疑兩舉也兩舉在春而史略其月
也胡氏以為兩稱晉侯甚之也脩曹衛之怨而伐之已
甚晉矣貶不再稱侯也稱侯固非貶也公子買戍衛不

卒戍刺之左氏曰買為楚戍衛楚人救衛不克公懼于
晉殺買以說焉謂楚人不卒戍也是買無罪而殺之也
內殺諱刺也楚人救衛書救善之也三月丙午晉侯入
曹執曹伯畀宋人書入書執畀甚晉之脩怨也夏四月
己巳晉侯齊師宋師秦師及楚人戰於城濮楚師敗績
是時荆楚日強馮陵諸夏滅黃敗徐執宋襄又戍穀逼
齊晉文一戰而威楚是以伯也書城濮之戰與晉也楚
殺其大夫得臣以敗績殺得臣書殺大夫罪專也衛侯

出奔楚何以出奔楚也晉偁之也不書名史略之也而胡氏以為著晉文之罪鑿也晉文驅夏入楚誠有罪矣春秋顧以不名衛侯罪之疑不若是之曖昧也五月癸丑公會晉侯齊侯宋公蔡侯鄭伯衛子莒子盟于踐土陳侯如會踐土之盟據左氏天王下勞晉侯矣此不書者周史事也而胡氏以為仲尼削之鑿也子衛失國故也公朝于王所王之下勞諸侯非也而諸侯于其所而朝之禮也六月衛侯鄭自楚復歸于衛衛元咺出奔晉

諸侯嗣故得稱復也名之者仍史之文也而胡氏以為殺叔武也殺叔武衛史也仲尼不得而與也陳侯款卒以赴書也秋杞伯姬來莊公女歸寧也公子遂如齊聘也冬公會晉侯齊侯宋公蔡侯鄭伯陳子莒子邾子秦人於溫陳稱子在喪也天王狩于河陽晉召之也書狩于河陽臣不可以名君諱之也壬申公朝于王所朝於河陽也晉人執衛侯歸之于京師衛元咺自晉復歸於衛左氏以元咺與衛侯訟衛侯不勝故以君執而歸之京

師以其臣歸衛罪晉之詞也諸侯遂圍許諸侯皆朝王而許獨不會故圍之也曹伯襄復歸于曹遂會諸侯圍許名曹伯仍史之文也胡氏以為曹伯賂晉而歸國故名之即左氏可徵亦晉事也仲尼烏得而與之也 二

十有九年春不書王正月史闕也介葛盧來介東夷國也公羊曰何以不言朝不能乎朝也公至自圍許以反至書也夏六月會王人晉人宋人齊人陳人蔡人秦人盟於翟泉左氏曰公會王子虎晉狐偃宋公孫固齊國

歸父陳轅濤塗秦小子慙盟於翟泉尋踐土之盟且謀
伐鄭也蔡人無名傳失之也天子諸侯之卿而稱人史
略之也胡氏以為仲尼貶而稱人也仲尼烏得而貶人
也公羊註以晉不能致諸侯而使微者會惡伯功之廢
于是似也秋大雨雹周之秋夏之春二三月也雨雹紀
異也而胡氏以為政在大夫之徵鑿也冬介葛盧來先
是公圍許不在故復來也三十年春王正月事闕也
夏狄侵齊左氏曰狄間晉之有鄭虞而侵之也書之著

侵暴也秋衛殺其大夫元咺元咺訟君殺之宜也而仍書大夫見不當專殺也及公子瑕書及以元咺之故殺之也瑕無罪而殺之尤過也衛侯鄭歸於衛胡氏曰衛侯出奔于楚則不名見執則不名今既歸國復有其土地矣何以反名之不名者責晉文之以小怨妨大德名之者罪衛侯之以收害戕本支此皆信傳而求之過也名不名者皆仍史之文也晉人秦人圍鄭晉伐鄭討無禮也而秦助之已而秦伯私盟于鄭戍鄭而去之秦晉

之怨始此也介人侵蕭蕭宋之附庸也書介人侵蕭罪
夷也冬天王使宰周公來聘公子遂如京師遂如晉公
羊傳以為大夫無遂事其言遂何公不得為政耳言公
子遂矯君命聘晉此意之也焉知非君命也而胡氏又
以天王使上卿來聘而魯不朝京師使公子遂載二命
出也為履霜堅冰之漸諸侯之朝王固有時也安得以
意而苛責之也 三十有一年春不書王正月史闕也取
齊西田齊西田曹田也晉分賜諸侯不書晉者不與晉

也晉安得而擅以曹田分賜諸侯也公子遂如晉左氏曰拜曹田也夏四月四卜郊不從乃免牲諸侯不得郊天魯以周公故得用天子禮樂卜而不從不與郊也猶三望望祭山川也諸侯非封內山川不祭書猶三望非禮也秋七月事闕也冬杞伯姬來求婦婦人無主婚之禮書求婦貶也狄圍衛衛遷于帝丘避狄難也書之著狄之侵暴也三十有二年春王正月事闕也夏四月己丑鄭伯捷卒以赴書也衛人侵狄報前年狄之

圍也秋衛人及狄盟書人衆詞也左氏曰狄有亂衛人
侵狄狄請平而與之盟也衛弱而狄強不盟且亡而胡
氏罪衛不當與夷盟過也冬十有二月己卯晉侯重耳
卒以盟主赴也三十有三年春王二月秦人入滑滅
而書入弗能有其地也齊侯使國歸父來聘書有禮也
夏四月辛巳晉人及姜戎敗秦師于殽晉方有喪而伐人
非禮也晉侯墨衰從事而不書侯者略之也胡氏以為
貶而人之也非也凡國君在喪例稱子不子不侯而人

之故曰略之也癸巳葬晉文公以會書也狄侵齊左氏
曰因晉喪也公伐邾取訾婁左氏曰報升陘之役也秋
公子遂帥師伐邾左氏曰邾人不設備故襄仲復伐之
也書之甚魯也晉人敗狄于箕以其侵齊也冬十月公
如齊十有二月公至自齊左氏曰公如齊朝且弔有狄
師也兩書月志久也乙巳公薨于小寢小寢非路寢也
不正其終也隕霜不殺草李梅實紀異也晉人陳人鄭
人伐許傳無徵也

卷之三

春秋

書

春秋億卷三